

1 PITAA

Pitaava tauraanaa qara vara kyora

Iesusira ru kyovaro qutu viro qati siviro nyaamwuni uro varuvaro 30 ihive 35 ihive nritarovaro Pitaava mwaa quara qara ntumwa tora. Mwi entara Iutaavanto Iutaa mwaanra qua riolahua Iesusira nraakye qora qoraqama nyate varuvata Iesusira nraakye qora airivanto tiqata, Iesusira vataqi vunanra kyaara tirivata rivorave, timwa kyeta Ierusaremaitavata, Iutaa mwatasaitavata, kyatu kyaatu hita uro mpo nani mpo nani varirerata vurama.

Mwihua mwini uto varuvata Iutaa vaisivanto mwini varuhuavata, mpo vaisinramwuvantavata, Iesusira vataqi vura kyaara mwihua qoraqama nyate varura. Mwihua qoraqama nyate varuvata Iesusira nraakye qoravanto Iesusira vataqi vura kyaara muaanra vareqata pupohevorave tiro, Pitaava mwihua kepukyaqama nyatarero mwaa quara qara ntumwa tora.

Iesusiva sita vato nraaqiarahua 12 nramwuqitairo Pitaavavata varura.

1 ¹Nte Pitaava. Iesusi Karaisiva ni nronraqama kyaihana nte mwia kyaiqa vare varuvama varina. Nkye nraakye qora nkyeta mwaata qaqla kye kyatu hita uto Pontiaasinive, Karesiaanive, Kapatosiaanive, Esiaanive, Pitiniaanive, variahura rieqanama nte nkyini qara ntumwa tena.

²Haaru Kotiva tiri tiqova nkye hia varu entara nkyiara ni nraaqiara variate tiro, nkyi nai kyaama tora. Nkyiara kyuqema kyotata nraakye qora nraahu variate tiro, nai mwanraqura nkyi nyinro. Nkyiara Karaisira qua riemwaqita quate tiro, Karaisira nraanrevanto nkyi hiqama nyataira. Kotiva nkyi kyuqema nyatairaro nkyi mwutukyavanto qihakyama vahirata variata.

Kyuqema kye variva nyaamwuni nkyi sekai vaho tura

³Nrivaqe Kotira nrutu tuaaheraare. Kotiva mwanriqavanto variqaro mwiva tiri vunyaa vaisi Iesusi Karaisira qova varirama. Kotiva tiriara po kye timwa timwa teqaro tiriara qaraakya nraakye qora variqata ekyaa

enta qati variqita quate tiro, mwiva Iesusi Karaisiva qutu vuraqitairo qati vara sivuma kyora. Kotiva Iesusi Karaisira qati vara sivuma kyorara tita, tire nraakiara Kotiva tiri tivitairaqe mwiavata uro nyaamwuni variananra vekeyama varuro.

⁴Kotiva mpo inraikya mpo inraikya kyuqe inraikya nraahu tiri kyaama tai inraikyavama nyaamwuni vahiro. Mwini vahirara tiro, mwi inraikyava hiama qio ntenra viro taiqa quananro.

⁵Nkye Kotirara kepukyaqama kyeta riemwaqita vi variavaro Kotira peqvanto nkyiqa vaimwanraanra ntaqikyi varihata variara. Kotiva nkyiqa ntaqikyiqiro viviro ekyaara entaqaa nraakyе qora huvantu nyatero sitaani okyarara terama taariva qovara hiananro.

⁶Nkye mwi quara rieqatama mpoqama kyeta qamwateqata variata. Nkye mwi quara riemwaqita vivaro mwaa entara nanra nanra inraikyavantove qovarama viro nkyi qoraqama nyatairera, nkye hia mwi inraikyava nkyi antua kyairata mpo qua taunru kyaraitita, qati riemwa tetu qamwateqata variqita quata.

⁷Mwi inraikyava mwi inraikyava nkyi qoraqamaqiro viraro nkye Kotirara kepukyaqama kye riemwaqita vi okyarara Kotiva qio mwia mwataara hiqaro taqaananro. Korivanto hia ekyaa enta vahiani inraikyava vaharo vaisivanto mwi orira mwataara hirero qiaqtairo mwia mwataara hiqaro taqe varira. Korivanto qumina orivanto nraahu vaharo nkye Kotirara kepukyaqama kye riemwaqita viva mwiva nritarero vaharo Kotiva mwianrama nronraqama kyero riero. Vaisivanto kori mwataara hintema kyero Kotiva nkye mwianra kepukyaqama kyeta riemwaqita vira mwataara hi variro. Mpo inraikya mpo inraikyavanto nkyi qoraqamaqiro virata nkye Kotirara nraahu kepukyaqama kyeta riemwaqita vivera, nraakiara Iesusi Karaisira qovarama kyaani entaraqaa Kotiva nkyi nyutu tuaahera kyero nkyi nronraqama kyero nkyi qamwata nyataananro.

⁸Nkye Iesusi Karaisira hia taqaahua variavaro nkyi mwutukyavanto mwianra vahira. Nkye matevata hia mwia taqaahua variqata nkye mwianra kepukyaqama kye riemwaqita vi variara. Nkye Jesusirara mpoqavata qamwateqata variarara tiro, nkye nkyeta nroqitaita mwianra mpo qua vutu kye tiva hiama qio vahiananro.

⁹Nkye Jesusirara kepukyaqama kye riemwaqita viraqaatairo nkyi mwanraqura huvantu kyaari inraikyava qovara hiananro.

¹⁰Haaru poropetinramwuvanto variqata Kotiva nraakyе qora huvantu kyero sitaani okyarara ntapihi kyeta riarerata uti variqata Kotira qua, mpo qua mpo quara nraato tara hiqata varura. Kotiva mwihua kyaahaqa huvata mwihua Kotiva nkyi kyuqema nyatarera hianinranra qoqama kyeqata tura.

¹¹Karaisira mwanraquravanto mwihuaqi variqaro timwa nyinro tiqaro, Karaisiva nriqa vi inraikyara varaqiro viro mwiaqaatairo mwiva

nronraqama viraro mwia nrutuvanto virito vahiananrove, tuvata mwihua mwi quara qara ntqata nraato tara hita tqata, Taireve mwitaa hiananrove? Ta vaisivave mwitaa mwitaa hiananrove? tura.

¹² Mwihua ntapihi kyovaro mwihua qati varu entaraqaa mwi inraikyava qovara hiariva hia vahura. Mate nkye varia entaraqaama mwi inraikyava qovarama viro. Kotiva nai mwanraqura nyaamwusairo titovaro mwiva vaised mponramwu kyaahaqa huvata mwinramwuhua mwi quara kyuqe mwakyaakyu nkyi timwa nyuvata nkye riora. Qikye, nyaamwunyaahuavata mwi quara okyara ntapihi kyeta riataa ihata variara.

Kyotataqama kye variqata kyuqe kyaiqa nraahu varaqita quate tura

¹³ Mwi quara rieqatama vutunte vurunte qakyaa hirara terama teta variata. Nkye vu nraato kyuqema vahirata variata. Iesusi Karaisiva nai qovarama viro nkyi kyuqema nyataani entara mwi entara vekya variqata mwianra nraahu riemwaqita quata.

¹⁴ Nkye Kotira nraaqiara variqata nkye mwia qua riemwaqita quata. Haaru nkye Kotira qua hia riaraitita varu entara, nkye nkyita mwutukyavanto vahu inraikyara qora inraikya nraahu vararerata uti varura. Nkye mwaa entara mwitaamaqita vivora.

¹⁵ Kotiva nkyi nyaanrama kyero sita varaiva, mwiva kyotataqama kyero variqaro kyuqe kyaiqa nraahu vare varurara tita, nkyevata kyotataqama kye variqata Kotira nraantantamwa kyeta kyuqe kyaiqa nraahu varaqita quata. ¹⁶ Kotira mpukuqi Kotiva mwitaama tiro:

Nte kyotataqama kye variqana
 kyuqe kyaiqa nraahu vare varurara tita,
 nkyevata kyotataqama kye variqata
 kyuqe kyaiqa nraahu varaqita quate, tura. (Wkp 11:44-45)

¹⁷ Kotiva hia vaisi nrutuara rieqaro mwi vaisiva nronra vaisive mwi vaisiva pata vaisive tiraitiro, mwiva vaisi kyuqe kyaiqarave qora kyaiqarave rieqaro qua avuqvavuqama kye varira. Nkye mwianra rieqatama Kotirara aakyara nteta tiri tiqvavate tiqatama mwatani variqi viqata Kotirara aatumma kyeqata variqi quata.

¹⁸ Haaru nkye haivaqahua timwa nyu quara nraahu rieqatama nkye qumina aanaa nrohi varuvaro Kotiva nkyiara nte mwihua huvantu kyaarita qatinani nritareta quate tiro, mwiva nkyi kyoqaa hirero hia qumina taiqaani inraikyara ori munimaqove, kori munimaqove, kyoqaa hiraitiro, ¹⁹ Kotiva nkyi Karaisira nraanreqotairo kyoqaa utu taira. Karaisira nraanrevanto ekyaa kyoqaa nraatara kyairia. Sipisipi hia mwia mwamwantaqaa mpo nramwanaamwawata vahura kyuqe mwamwanta vataara ru kyontema kyeta Karaisira ru kyora.

²⁰ Haaru hia mwaa mwatara ututo entara Kotiva tiqaro, Karaisiva mwi kyaiqara varaananrove, timwa kyero mwia mwatama tero variqiro viro mwaa entara nkyiara rieqaro Kotiva Karaisira qovarama kyairia.

²¹ Karaisiva nkyi kyaahaqa hianinranra tita, nkye Kotirara kepukyaqama kyeta riemwaqita vi variara. Kotiva Karaisiva qutu vuraqitairo qati vara sivuma kyero mwia nrutu tuaaheraate tiro, mwia nronraqama kyora. Kotiva Karaisira mwitaa hurara tita, nkye tiqata, Qutaama Kotiva tirivata mwitaa hiqaro tivitaananrove, ti variara.

Nkyeta qata vakyaahuara mwutukya vahirata variate tura

²² Nkye Kotira qua quataa qua riemwaqita quavaro Kotira quavanto nkyi mwutukya hiqama nyataiharo nkyi mwutukyavanto nkyita sata sakyaahuara vahata variara. Mwiaqaataita nkye nkyita sata sakyaahuara quetaaqama kye mwutukya vahirata variata.

²³ Nkye varirerata qaiqaa qaraakyaqama kyero mwatatai nraaqiarahua variara. Hiama qutu quari inraikyava nkyi qaiqaa mwata tairata nkye qaiqaa qutu vivarave. Kotira quavanto qati vahiqiro vi vari quava, mwiva nkyi qaiqaa mwata tairama. Mwi quava ekyaa enta qati vahiqiro quananro.

²⁴ Kotira mpukuqi mwitaama tiro:

Mwukyauvanto vahiqiro viro uro aaharama vintema
kyero vaisivantovata variqiro viro
uro ekyama taiqa quananrove.
Ntontora riemwa tero iteqaro
kyuqema kyero ntuvaahero uro tapupu hintema kyero
vaisi peqvantovata taiqa quananrove.

²⁵ Kotiva qiani quava nraahuma ekyaa enta
qati vahiqiro quananrove, tura. (Ais 40:6-8)

Qio Kotira qua kyuqe mwakyaakya nkyi timwa nyiavata nkye mwi quara riaara.

Kotira quavanto nkyi kyarama vaiho tura

2 ¹ Nkye Kotira qua rie variahua variqtara tita, nkye uaquia hi kyaiqara ekyaa qaqlira kyaata. Hia unra qiata. Hia unraqama kyeqata kyuqe kyaiqa varaata. Vaisi mpovanto kyuqema quaninranra hia mwia nronri nrili kyamwu ntumwa mwataata. Hia mpora nrutu vara mwatanipa hiqata uaquia hi quara qiata.

² Nraaqiara akirivanto nraamwanra mpo utintema kyeta nkyevata Kotira nraaqiara qaraakya variahua tita, Kotira quara nraataa hirata variata. Kotira quavanto nkyini kyuqe nraamwa voti hivama vahiro. Mwi nraamwanra kyuqe hi nraamwanra nreqatama nkye kyuqema kyeta nronra tuemwa vivaro Kotiva nkyi huvantu kyero sitaari.

³ Kotira mpukuqi mwitaama tiro:

Nkye Kotira kyaiqa vareqata taqaavarro
Kotiva nkyi kyuqema nyate varivama variho, tura. (Sng 34:8)

⁴Nkye nronravanto Karaisiva varinani nriata. Karaisiva qati variqiro quari puhamama variro. Qumina vaisinramwuvanto mwianra hia kyuqe puhave tiqata mwia qoririma kyaavararo Kotiva mwia nai kyaama tero ni puha kyuqera vahiananrove tiro.

⁵Nraamwu kyaara qati vahiqi vira votima kyeta nkyevata variavaro Kotiva nkyiqotairoma nai nraamwu hoqarero uti variro. Nkye mwi nraamwunraqi variqata Kotira kyaiqa vara mwate vari vaisihua variqata Kotirani kyuqe kyaiqa varaqita quata. Nkye mwitaa hivaro Kotiva Karaisirara rieqaro nkyi kyaiqara qamwataaanro.

⁶Kotira mpukuqi Kotiva mwitaama tiro:

Taqaaate, nte puha kyuqera ntene mwatama taura
Saioni mwatukya utaqaa rataurave.

Mwiaqaa vuntu viro variariva hiama kyauruananrove,
tura. (Ais 28:16)

⁷Nkye Karaisirara qutaa mwivave timwa kyeta mwiaqaa vuntuvi variahua, nkye tiqata, Karaisiva tiri puha kyuquerave, ti variara. Mpo hiahua hia Karaisirara qutaa mwivave qiahua, mwihua mwiaqaaatai huntavaivaimaqita kyaamwu ntuara. Kotira mpukuqitairo mwitaama tiro:

Mwihua nraamwu hoqeja tiqata,
Mwaa ori uaqia hirave, timwa kyeta qoririma mwataava,
mwi orivama puhaqama viho, tura. (Sng 118:22)

⁸Kotira mpukuqitairo mpo quavata tiqaro mwitaama tiro:

Ori mwaaqaataita vaisivanto
huntavaivaimaqita ntuqutu vivarave.
Qoqaraa ori mwiaqaaataita nraahu vaisivanto tantu
vaantumaqita kyaamwu ntivarave, tura. (Ais 8:14)

Mwihua hia Kotira quara qutaa quave tiqatara tita, mwihua huntavaivaimaqita ntuqutu quara mwianra haaru Kotiva qio mwihua mwitaa hivarave tura.

Nkye Kotiva nai kyaama tai nraakye qorahuama variavo tura

⁹Nkye hia mwihua hiante hiavo. Kotiva nkyiara ni nraakye qora variate tiro, nkyi nai kyaama tihata variavo. Nronravanto Kotiva varihata nkye mwia kyaiqa vara mwate vaisihuama variavo. Nkye kyonataqama kye varia nraakye qorahuama variavo. Nkye Kotira nramwunaahuama variavo. Mwiva nkyiara nte nkyi kyuqema nyataaninranra mpo nraakye qora timwa nyiate tiro, Kotiva nkyi kyokiraqitairo nyaanrama varero uro omwavanto itaira kyuqe hinani kyaihatama variavo.

¹⁰Nkye vuni qumina nraakye qora varura. Mate mwaa entara nkye Kotira nraakye qorama varita. Haaru Kotiva hia nkyiara po kye timwa nyatovata nkye varura. Mate mwaa entara Kotiva nkyiara po kye timwa nyataihata variara.

Tire Kotira kyaiqa vaisima varuro tura

¹¹ Po, ni nramwunaa tuaavo, nkyi mwaata tananra hia mwaa mwataraqaa vahira. Nkye mwaini variqata nkye mpo mwatanaahua votima kyeta variara. Nkye mwianra rieqatama nkyi mwamwantavanto uaquia hi kyaiqara varaataa hira hia varaata. Nkyi mwamwantavanto nkyi mwanaraqura nraatara kyero mwiaqaa ntaqikyirero uti varihata variara.

¹² Hia Kotira qua riehua varivata nkye mwihua suqaa ntapihi kyeta nrohiata. Nkye mwitaamaqi vivata mwihua nkyiqa qua vatarerata mpo inraikyaqaa ntumwa kyeta tuqasaaqasama kyeta unra qua tivera, mwihua quavanto hia qio vahianinra. Mwihua quavanto hia qio vahirata mwihua nkyi kyuqe kyaiqa taqeta nronravanto tumuani entaraqaa mwihua Kotira nrutu tuaaherevara.

¹³ Nkye tiri vunyaa vaisi Karaisirara rieqata ekyaa kamaninra kyaiqa vaisi qua riaata. Kamaninra kyaiqa vaisi vunyaa vaisi mwia qua riemwaqita quata. ¹⁴ Kamaniva nronraqama kyaihua nkye mwihua quavata riemwaqita quata. Mwia qua nteqa kyehua ntuqutita, mwia qua riehua qamwata nyataate tiro, kamaniva vunyava nai nraakiaraanaa vaisi mpovata nronraqama kyaira.

¹⁵ Kotira kyakyahiva nkyi mwitaamama vahiro: Nkye kyuqe kyaiqa nraahu vare varivaro hia vu nraato vahiarhua nkyiara api qua tiva hia qio vahirata mwihua tirema varivara.

¹⁶ Uaqia hi kyaiqava nkyi ntavaaqavu kyaankyo tiro, nkyi huvantu kyaihata nkye qatinani nritareta variara. Nkye qatinani nritare varita tiqata, Tire qatinani varurahuave, tiqata nkye uaquia hi kyaiqara utivora. Nkye Kotiva rupa tai vaisihua votima kyeta variqita nrohiata.

¹⁷ Nkye variqata ekyaa nraakye qorara kyuqe hiahuave nraahu qiata. Nkye Iesusira nraaqiara variqata nanrianra nanrianra mwutukya vahirata variata. Nkye Kotirara aatuma kyeqata variqi quata. Kamaninra vunyaa vaisiara nronra vaisive qiata.

Karaisiva nriqa vi inraikyara varaintema kyeta nkyevata varaqita quate tura

¹⁸ Nte nkyi kyaiqa vaisiara tirera. Nkye kyuqema kyeta kyaiqa vareqata nkyeta nronra vaisi qua riemwaqita quata. Nkyi nronravanto nkyi kyuqema nyateqaro nkyiara mwi kyaiqara varaate tirera, mwia qua riemwaqita quata. Nkyi nronravanto hia nkyi kyuqema nyateqaro nkyiara mwi kyaiqara varaate tirera, mwia quavata qati nraahuma riemwaqita quata.

¹⁹ Nkye mwitaama variqita vivaro Kotivama nkyi kyuqema nyataananro. Nkye Kotira qua riemwaqita vi varivaro vaisi mpovanto qumina inraikya kyaara nkyi qoraqama nyatairera, nkye nriqa quani

inraikyara vareqata kepukyaqamaqita vi varivaro Kotiva mwianra rieqaroma nkyi kyuqema nyataananro.

²⁰ Nkye uaqia hi kyaiqara utivata mwia kyaara nkyi rivata nkye kyaakueqama varivera, Kotiva hiama mwianra rieqaro nkyi kyuqema nyataananro. Nkye kyuqe kyaiqa nraahu vare varivata mwia kyaara nkyi rivata nkye kyaakueqama varivera, Kotiva mwianra rieqaro nkyi kyuqema nyataananro.

²¹ Nkye mwitaamaqita quate tiro, Kotiva nkyi nyaanrama taira. Karaisiva nkyiarave tiro, nriqa vu inraikyara vareqaro Karaisiva nkyiara nte hiarintema kyeta nkyevata mwitaa hiate tiro, mwiva nriqa vu inraikyara varaqiro vura.

²² Karaisiva hia qora kyaiqvavata varovaro mwia nroqitairo hia unra quavantovata qovara hora.

²³ Mwihua Karaisirara uaqia hu quara tuvaro Karaisiva hia nkyiariaravata uaqia hu quara tura. Karaisiva nriqa vu inraikyara vareqaro hia mporara tiqaro, Nraakiara ina qoraqama mwataaninrave, tiraitiro, Karaisiva Kotirara nraahu nronraqama kyero riero tiqaro, Kotiva ni qua avuqavu hiqaro qua avuqavu ti varivave. Mwiva nraahuma ni kyaahaqa hiananrove, tiro tura.

²⁴ Tiriara mwihua hia qora kyaiqa utiraitita, kyuqe aanraqaa nraahu quate tiro, Karaisiva tiriara rieqaro tiri uaqia hu inraikyara varero uro kyatariqaa qutu vura. Karaisira mwamwanta toqa ntupepaama kyaaraqaataita nkye kyuqema vita variavo.

²⁵ Sipisipivanto api nrohintema kyeta nkyevata kyuqe aanraqaataita apiqama kyeta nrohi varura. Mate mwaa entara nkyi sita varaihata nkye nrumu ntanteta nkyi mwanraquraqaa ntaqikyi nyate vari vaisira mwia vataqita vi variara.

Nraata vaati varaa nraakye qorahuara tura

3 ¹⁻² Nte nkye vaati varahuara tirera. Nkye nkyeta saatimwanra qua nraahu riemwaqita quata. Nkye mwitaamaqi vi varivata nkyi saatimwanra hia Kotira qua riehua nkyi kyuqe kyaiqa taqeta tiqata, Kyai tirevata mwihua nraantante Kotira qua riemwaqita quare, tivara. Nkye nkyeta saatimwanranra hia mpo qua tiraitita, kyuqe kyaiqa nraahu vareqata nkyeta qoraisiara nraahu riemwaqita vivata mwihua nkyiara mwitaama qia.

³ Nkye kyuqe nraakye varirera hiqata nkyeta nyamwanta mwunruqa hi inraikyara hia qamwataata. Hia qiaa mwunruqa hirara nronraqama kyeta riaata. Hia nkyeta nyamwantaqaa ntumwaqute inraikyara nronraqama kyeta riaata.

⁴ Nkye kyuqe nraakye varirerata nkyeta utaqive mwutukyaqive mwunruqa hirara nronraqama kyeta riaata. Nkyi mwutukyaqitairo

kyuqema kye mwunruqa hi inraikyava qovara hiananro. Mwia mwutukyaqitairo qihakya hi variani nraakyera, mwi nraakyerara Kotiva qamwata mwatero kyuqe nraakyeve qiananro.

⁵Haaru Kotira nrutu tuaahereqa varu nraakyehua variqata Kotiva nriqiqaa kyauqu vatero tu quarara riemwa tetu nkyiari saatimwanra qua riemwaqita vuva, mwi quava mwinramwuhua mwunruqama to inraikyava vahura.

⁶Tiri haivaqava Seraava mwitaa hi varu nraakyeva varura. Mwiva nai vaati Evarahaamunra qua riemwaqiro vi variqaro mwianra tiqaro, E niqaa ntaqikyi variaravave, turama. Nkye nraakyehua kyuqe kyaiqa nraahu vareqata hia mpo inraikya nraatu aatu hivera, nkye Seraara nraamwunramwanrama varivara.

⁷Mwia votima kyeta nkye nraakyehua saatimwanravantovata kyuqema kyeqata nkyeta nyaatamwanraaqaa ntaqikyiqi quata. Nraakyehua nyamwantavanto hia kepukya nyamwanta vahirara tita, nkye nkyeta nyaatamwanraaqaa kyuqema kyeta ntaqikyiqi quata. Kotiva nkyi kyuqema nyaataintema kyero Kotiva nkyi nyaatamwanravata kyuqema nyaatairata mwihuavata ekyaa enta qati variqi virara tita, nkye mwianra rieqatama kyuqema kyeta mwihuavata ntaqikyiqi quata. Nkye mwitaa hivera, hia mpo inraikyavanto nkyi antua kyairata nkye qioma Kotirara aakyara ntamwaqita vivara.

Nkye kuaara nraati nraahu variate tura

⁸Nte mwaa quara taiqa kyarera hiqana mwitaama tina, Nkye variqata kuaara nraati nraahu variata. Nkye nanrianra nanrianra po kye tiqata variata. Nkye Kotira nraaqiara variqtara tita, nanrianra nanrianra mwutukya vahirata variata. Hia nkyeta nrutu tuaheraraitita, nanrianra nanrianra kyuqe hiqata variata.

⁹Mpowanto nkyi qoraqama nyaatairera, hiama nkye naivata qoraqama mwataata. Mpovanto nkyiara mwaaquqama quate tirera, hia nkye nanrianra, Enavata mwaaquqama vinanrave, qia. Nkye mwi vaisirara tiqata, Kyairaro Kotiva i kyuqema mwataarive, qia. Kotivavata nkyiara kyuqema vita variate tiro, nkyi nyaanrama tairara tita, nkye mwitaama qia.

¹⁰Kotira mpukuqi mwitaama tiro:

Kyuqema kyero variqaro
airi enta qati variqiro quari vaisiva,
mwi vaisiva qora kyaiqa qaqla kyero hia unra tirera,
mwiva qioma kyuqema kyero variqaro
qati variqiro quananrove.

¹¹Mwi vaisiva qora kyaiqa mwoqa mwinro
kyuqe kyaiqa nraahu varaqiro quarive.

Mwi vaisiva antua qua qaqlira kyero
 mwia mwutukyavanto qihakyama viraro
 kyuqe qua nraahu timwaqiro quarive.

¹² Nronravanto nai vuqotairo kyuqema kyero
 nrohi vari vaisira taqamwaqiro viro nai nraatoqotairo
 mwianra aakyara nte variahua qua rie varirave.

Qora kyaiqa vare nraakyе qorahua variavaro
 nronravanto mwihua mwoqa nyinrave, tura. (Sng 34:12-16)

¹³ Nkye kepukyaqama kyeta kyuqe kyaiqa nraahu varaqi vivera, tavave
 qio nkyi qoraqama nyataananro?

¹⁴ Nkye kyuqe kyaiqa vare varivaro mpovanto mwia kyaara nkyi
 qoraqama nyatairata nkye nriqa vi inraikyara varaivera, qamwateqa variata.
 Nkyi qoraqama nyate vari vaisihua nyaatu hia aatu hita hia ua hiata.

¹⁵ Nkye Karaisirara kyuqevave tiqatama mwianra nraahu tiriqa
 ntaqikyiqira quante qiata. Nkye terama te varivaro mpovanto nkyi
 nkye nanra quave riemwaqi quavo tirera, nkye Karaisirara riemwaqi vi
 quara mwia timwa mwiata.

¹⁶ Nkye mwi quara mwia timwa mwinrenra hiqata mwi vaisira
 kyuqema mwateqatama qihakyama kyeta timwa mwiata. Nkyi
 toqaamwu ruankyorave tiqata vivinrama kyeqata variqi quata. Nkye
 mwitaama vivinrama kyeta variqi vivata mpo vaisinramwuvanto nkyi
 kyaiqara qora kyaiqave tivera, mwiaqataita mwihua nkye Karaisira qua
 rieqata nrohira taqeta kyaurira inraikya varevara.

¹⁷ Kotira kyakya hiariva nkyiara mwihua kyuqe kyaiqa vareqatama
 nriqa vira inraikya varevarave tirera, nkye mwianra kyuquerave tivara.
 Nkye qora kyaiqa vare varira kyaara nriqa vira inraikya varaivera, nkye
 mwianra hia kyuquerave tivara.

Karaisiva tiriara rieqaro nriqa vu inraikyara varaqiro vura

¹⁸ Karaivisa tire qora kyaiqa uti varuna quara ekyara taiqa kyarero
 mwivavata nriqa vu inraikyara varero uro kuaa nani qutu vura. Tire qora
 kyaiqa uti varurahua mwia kyaara teta qutu quataara vaiharo Karaivisa
 ntapihi kyero variva tiriara rieqaro uro qutu vura. Tiri tivita varero
 Kotiva hinani uro kyaankye tiro, Karaivisa tirara rieqaro qutu vura.
 Karaivisa ru kyovaro mwiva qutu vuvaro Kotiva mwia qati vara sivuma
 kyovaro mwiva mwanraquravatama kyero qati siviro varura.

¹⁹ Karaivisa mwanraquravanto qati siviro uro rupa to mwanraqurahua
 mwakyaakya timwa nyunra. ²⁰ Haaru Noaava varu entara mwihua
 Kotira qua nteqa kye varuvaro Kotiva hia mwihua qamwanrama ntuquku
 kyaraitiro, variqiro vuvaro Noaava nramanriqaa quani nraamwunra hoqa
 taiqa kyovaro humwunravanto utuvaro Kotiva nraakyе qora 8 nramwu
 nraahu kyaahaqama nyatovata mwinramwuhua qio varura.

²¹ Mwinramwuhua qora kyaiqa vare varu nraakyе qorahua qaqlira mwini kyeta mwinramwuhua nraahu nraamwuqi nramanriqaa variqata qio varura. Mwia votima kyeta tire qora aanra qaqlira kyeta nramanri vare kyuqe aanraqaa vi varunana. Tire nramanri vare varuraro hia nramanrivanto tiri mwamwanta hiqama timwate varirave. Tire nramanri vare tiqata, Kyai qora aanra qaqlira kyeta Kotira aanraqaa nraahu quare, tiqata nramanri varaunana. Tiriara Kotira aanraqaa quate tiro, Iesusiva cutu vuraqitairo qaiqaa qati sivura.

²² Iesusiva cutu vuraqitairo qaiqaa qati siviro mwiaqatairo nyaamwuni viro mwaa entara mwiva Kotira kyauqu kyaatutani uro variqiro viqaro ekyaa nyaamwuni vahi inraikyaraqaave, ekyaa nyaamwuni nronraqama quaninraqaave, ntaqikyiqiro vi varira.

Nkyevata nriqa vi inraikyara vare aanrava vahiananrove tura

4 ¹Karaaisiva vaisiqama viro variqaro nriqa vu inraikyara varaqiro vurara tita, nkyevata tiqata, Tirevata qioma nriqa quani inraikyara varaqi quananrave, qiata. Nkye qora kyaiqa varaororave tita, nriqa vi inraikyara varaqi viqata qioma qora kyaiqa nraatara kyevara.

²Nkye mwianra rieqata mwatanai qati variqi viqata nkyeta qora kyaiqa utuataa hianinra qaqlira kyeta Kotira kyakya hiani kyaiqara nraahu varaqita quata.

³Kotira qua hia ria nraakyе qorahua votima kyeta nkyevata haaru api nrohiqata nkyeta varataa hi kyaiqara varaqita vura. Qio mwiaqaa taiqaireqe hia qaiqaavata mwi kyaiqara utirerave qiata. Mwi entara nkye api qaraqita nrohi varurave, api inraikyara mwutukya vahuvata varurave, nkye nramanri nreqata uera ntorave, nkye omwata nronraqama kye nronranrave, kyarave nramanrive airiqama kye nronrave, nkye mwitaa hiqata nkye qumina vaisivanto ututo inraikyaraara mwanriqave tiqatama mwia nrutu nraahu tuaahere varura. Nkye haaru mwitaa mwitaamaqi viqata qoraqama vita varura.

⁴Mwaa entara nkye mwi kyaiqara qaqlira kyeta variavata hia Kotira qua riaa nraakyе qorahua nkyiara nkyevata tire hiarante hiate qiyata nkye mwihua qua hia riaraitita variavata mwihua nrihanrama vita mwia kyaara nkyiara qora qua ti variara.

⁵Qio riaata. Mwihua nraakiara ekyaa qua avuqavu hianinra vuqaa variqatama mwihua nkyiari uaqia hiani kyaiqara utira timwa qovarama kyevara. Ekyaa qua avuqavu hiariva Kotiva variqaro ekyaa qati varihuave, cutu vihuave, mwiva mwihua qua tukyama kyero riemwaqiro quananro.

⁶Mwianra rieqaroma Karaaisiva haaru cutu vuhuvavata kyuqe qua timwa nyunra. Haaru (Noaava varu entara) nraakyе qora mwihua Kotira qua nteqa kyovaro Kotiva mwihua ru kyovata cutu vura. Mwihua

mwanraquravanto Kotiva qati varintema kyero qati variqita quate tiro,
(Karaisiva) mwihuavata kyuqe qua timwa nyunra.

Ekyara enta qaumaqa hirara rieqata kyuqema kye nrohiqata variata

⁷Mwaa mwataro taiqari entava qaumatomu vahiro. Nkye mwianra
riaivar o nkyi mwutukyaqitairo hia raraqa tairata kyuqema kyeta
nkyetaqaa ntaqikyiqata nkyi mwutukyavanto qihakya hi varirata
variata. Vu nraato ntapihirata rieqata variata. Nkye mwitaamaqi viqata
qioma Kotirara aakyara ntamwaqita vivara.

⁸Vuni mwaa quara nraante riaata. Nkye nanrianra nanrianra
mpoqama kyeta mwutukya vahirata variata. Nkye mwitaamaqita vivaro
Kotiva nkye airi uaqia hi kyaiqara utira taunru kyaananro.

⁹Kyuqema kyeta nkyeta nraamwuqi nkyeta qata vakyaahua Iesusira
nraaqiara sita vateta kyara nyiata. Nyiqatama hia nrutu nraunru tiraitita,
qati kyara nraahu nyiata.

¹⁰Kotiva nkyi kyuqema nyateqaro nkyi kuaa kuaa mwihua mpo kyaiqa
mpo kyaiqa nyaamwutero mwi kyaiqara varera kepukyavata nyinranra
tita, nkye mwi kyaiqara varaqi viqata nai kyaahaqa hi nai kyaahaqa
hitamaqita quata.

¹¹Vaisivanto mwaanra tirera hiqaro Kotira qua nraahuma qiananro.
Vaisivanto mpora kyaiqa vara mwatarer a hiro tiqaro, Kotiva ni kyaahaqa
hi varihana nte qioma i kyaiqa vara mwataaninrave, qiananro. Nkye
mwitaamaqita vivaro Iesusi Karaisiraqaatairo Kotira nrutuvanto nronraqa
hiari. Kotira nrutuvantovata Kotira kepukyavantovata ekyaa enta qati
vahiqiro nraahu quananrove. Nte quitaama tuquo.

Muaanra varaqi viqata kyuqe aanraqaa nraahu quate tura

¹²Ni mwatanaa tuaavo, qiaqotairo mwataara hintema kyero mpo
inraikya mpo inraikyavanto nkyi mwataara hi varihata nkye variara.
Qio hia nkye nrihanrama vi tiqata, Nanraqamave mwi inraikyava
qoraqama timwa te variho? qata. ¹³Nkye mwitaama qata: Karaisiva
nriqa vi inraikyara varairara rieqama tirevata mwia kyaahaqa hiqata
nriqa vi inraikyara varaqita vi varuro, qata. Nkye mwitaa timwa kyeta
variqi vivaro Karaisira peqa okyaravanto qovarama quani entaraqaa nkyi
mwutukyaqitairo kyuqe hirata varivara.

¹⁴Nkye Karaisira vataqi vihua varivata mwia kyaara nkyiara uaqia
hi quara tivera, nkye qamwateqata nraahuma variata. Mwihua nkyiara
uaqia hi quara tivata nkye qioma tiqata, Kotira mwanraqura mpoqaraava
tirivata varihata varurahuave, tivara. Mwianra rieqatama qamwateqata
variata.

¹⁵Nkye vaisi ru kyera kyaarave, nkye mpuara utira kyaarave, nkye
kamaninra qua nteqa kyera kyaarave, nkye mpo vaisi kyaiqara qumina

antua qua tira kyaarave, nkyi qoraqama nyataivata nriqa vira inraikya varevora.

¹⁶ Nkye Karaisira nraaqiara variqata kyuqe aanraqaa nrohira kyaara nkye nriqa vira inraikya varaivera, nkye hia kyaurira inraikya varauro qiata. Mwataama qiata, Tire Karaisira nraaqiara varurahuara tita, mwianra rieqtama tire Kotira nrutu tuaaheraqi virerave, qiata.

¹⁷ Kotiva ko qiani entava nri ntairaro Kotiva tiri nai qua riaarahua nraante qua avuqavu hiananro. Mwiva vuni tiri qua nraante avuqavuma kyero, qikye, mwia nraakiara hia mwia nai qua riehua ko tiqaro nataama quave mwihuaqaa vataananrove.

¹⁸ Kotira mpukuqi mwitaama tiro:

Avuqavu nrohiari vaisiva mwukyaari tu kyero
kyuqe aanraqaa nrohiraro
Kotiva mwia huvantu kyero vitaananrove.
Avuqavu nrohiani vaisira okyaravanto mwitaama
vahirara tita, hia Kotira qua riehua
uaqia hi kyaiqara nraahu vare varihua
qora aanraqaa nrohita variqi vita qikye, mwihua
nraakiara tainive uro taiqa vivarave? tura. (Snd 11:31)

¹⁹ Kotira kyakya hiariva nkyiara qiomma nriqa vi inraikyara varaqi vivarave tirera, nkye Kotirara mwutukya qihakyama kyeta vateta kyuqe kyaiqa mwia qati nraahu varaqi quata. Kotiva tiri utu taiva hiama nai kyauqu nriqiqaa vateqaro quataa qua tiriara ti quara taunru kyaananro.

Nronra vaisinramwuanra mwitaa mwitaa hiate tura

5 ¹Nte nkyiqa ntaqikyi variahua nronra vaisinramwuanra tirera.

Ntevata nkyi votima kyena Iesusira nraakye qoraqaa ntaqikyi varuvama varina. Karaisiva nriqa vu inraikyara vare varuvana nte variqana ntene puqotaina taqaavara. Nraakiara mwia peqa okyaravanto qovara hiani entaraqaa ntevata variqana ntene puqotaina taqaaninra. Nte nkyi nronra vaisiara mwitaa mwitaa hiate qianinra riaata.

² Kotiva sipisipi votima kyero nkyinramwu nyinra nkyenramwu mwi nraakye qorahuqaqaa kyuqema kyeta ntaqikyiqi quata. Kotira kyakya hiva nkyiara mwi kyaiqara varaate tirara tita, nkye hia qoriri hiraitita, nkye mwihuaqaa kyuqema kye ntaqikyiataa hirata mwihuaqaa ntaqikyiqi quata. Hia kyoqaara rieqata mwi kyaiqara vararaitita, nraakye qorara nronraqama kye riaivar nkyi mwutukyaqitai varaataa hirata qamwateqata varaata.

³ Kotiva nkyinramwuanra ni nraakye qoraqaa ntaqikyi mataate tirara tita, hia nkyenramwu tire nronra vaisi varuro tiqata mwihua suni variqata kyuqe kyaiqa vare varivata nraakye qoravanto nkyinramwu kyaiqa

taqamwaqi viqata mwihuavata kyuqe kyaiqa varaqita quata. ⁴Nkye mwitaamaqi vi varivaro nraakiara sipisipi qova vunyaava tumuaninraqaa mwiva nkyi nronraqama kyairata nkye nronraqama vita vari okyarava ekyaa enta qati nraahu vahiqiro quananro.

Qaraakya vaisinramwuanra tura

⁵Nkye qaraakya vaisivantovata nkye kyuqema kyeta nkyeta nronra vaisi mwemwani variqata mwihua qua riemwaqita quata. Nkye ekyaa hini nraakyе qora mwihuavata hia nkyeta nyutuara nronraqama kyeta riaraitita, nkye nai kyaahaqa hi nai kyaahaqamaqita quata. Kotira mpukuqi mwitaama tiro:

Nai nrutu nraahu tuaaheraani vaisira

Kotiva raaquta kyaananrove.

Nai vara mwataniqa hiani vaisira Kotiva mwianra

po kye timwa mwatero mwia kyuqema mwataananrove,
tura. (Snd 3:34)

⁶Nkye mwi quara rieqatama nkyeta vara mwataniqama kyaivarо Kotiva kepukyavanto nkyiqa ntaqikyiqiro viqaro nraakiara mwivama kyuqe ihera nai mwatama taani iherara nkyi nyutu tuaahera kyaari.

⁷Hia qumina mpo inraikyara mpo inraikyara nronraqama kye riemwaqita vivaro nkyi mwutukyavanto uaqia hiari. Kotiva nkyiara nronraqama kyero rie varirara tita, nkye ekyaa mwi quara Kotira timwa mwivarо Kotiva nkyi kyaahaqa hiari.

⁸Nkye vu ntapairi kyeta viti viri taqeta rauriqata variata. Vaisi rukye vari vairiva, raionivanto nruqua timwaqiro viqaro vaisi ru kyarera uti varintema kyero nkyi nramwutaa Saataaniva vaisi taiqa kyarero uti variqaro viro nrinro hi varira.

⁹Nkye riavata ekyaa nkyi qata vakyaan mpoqi mpoqi variahua nkyi nraantantamwa kyeta Jesusira kyaara nriqa vi inraikyara vare variarara tita, nkyevata Kotira qua nraahu riemwaqi vita kyaakueqama variqata hia Saataaninra qua riaata.

¹⁰Nkye uqenraa nraakyе qorahua variqata nriqa vi inraikyara quaahaqa varaqita vivaro Kotiva naima nkyi kepukyaqama kyaananro. Kotiva nkyi kepukyaqama kyairata nkye kepukye nraakyе qora nraahu variqatama ntapihi kye variqi vivara. Kotiva tiri kyaahaqa hirero kyuqema timwa te variva, mwivama nkyiara mwihua Karaisira vatama kyeta kuaaqi variqata kepukyaqama kyeta ekyaa enta variqita quate tiro, nkyi nyaanrama taira.

¹¹Kotiva ekyaa enta variqiro viraro mwia peqavanto ekyaa enta vahiqiro quananrove. Qutaave.

Qua mwanteqaro ekyara qua tura

¹²Nte pata mwaa quaqiara nkyi timwa nyinrenra huqaro Sairaasiva qara ntumwa taihana nkyini vatena. Nte Sairaasirara mwiva ni katavanto

hia ni qaqlira kyaraitiro, ni kyuqema kyero kyaahaqamaqiro vi vari vaisivama variho tura. Nkyi mwutukyavanto kyuqe hirata variate tina, nte qara mwaaci Kotiva nkyi kyuqema nyataani okyarara nkyi timwa nyunra. Kotiva nkyi kyuqema nyatairata nkye avuqavuma kyeta nraahu nrohiata.

¹³ Kotira nraakye qora Papironini variahua nkyi voti hiahua Kotiva nai kyaama tai nraakye qorahua variqatara tita, mwihua nkyi nramwunaahua variqatama mwihua nkyi qua mwante varita. Nte ni maaque tu vaisiva Maakiva mwivavatama nkyi qua mwante variro.

¹⁴ Nkye Iesusira nraaqiara variqata nanrianra nanrianra mwutukya vahirata kyuqema kyeta nai quamwante nai quamwante hiata. Nkye Karaisira vatama kyeta kuaaci varihua varivaro nkyi mwutukyavanto qihakya hirata variata.